

養知書屋詩集

養知書屋詩集卷十二

湘陰郭嵩壽筠仙著

九日邀同吳南屏鄒谿山龍皞臣周桂陽石似梅張笠
臣黃子壽張子恆及意城登定王臺天心閣歸飲養知
書屋

二十四年無此會白頭攜酒話重陽風流十客八登閣

老病三秋一舉觴

近以病常歷
時不宴客

壞草遺臺今日夢杖藜

簪鬢少年狂黃花遲暮詩翁健勝事招尋到草堂

吳南屏有詩索和重賦一首

重九登臨稱賦詩江天樓閣好棲遲清尊白日嚴城晚

高詠西風落木時
隔水峯巒爭偃蹇
經秋雲物有推移
應添圖畫瀟湘裏
倒跨烏驢醉帽欹

次韻楊性農見贈

洞庭始波清入詩
盼君佳句來何遲
西湖秋雁忽歸處
老圃黃花待放時
地迴樓光雲不斷
望深窗影日頻移
新詩枉贈豈易得
閉戶高吟一枕欹

大湖以南幾能詩
極盛乾嘉生悔遲
夕日蹉跎行復老
數公瀟灑喜同時
從容杖履重陽會
畱滯江湖一棹移
三日待君成悵望
隔江惟見數峯欹

白蘭岩所藏錢竹初瀟湘攬勝圖

雨踏瀟湘萬里程水光山色遠隨人豈知一百年前客
爲寫重湖天際春丹嶂送寒連雨雪比日大雪白頭容我臥
松筠乞公健筆摹嵐景更挈新詩鐫翠珉

馮樹棠重游萬川圖

蜀道蠶叢在天上使君來去有扁舟清尊昨日黃花約
破帽西風白帝秋記否兒童迎杖履依然談笑接林邱
新歡舊澤都堪紀卻負恬園一度游時朱雨恬有恬園
看菊之約樹棠先
期爲此行

臘月二十九日和香蓀詩老作

義燧云徂道未湮發書相對日猶頻殘年催送樓頭雨

妙意參求雲外人吾黨斐然狂簡意先生何許葛懷民
養賢爲國空成悵地上區區蠅蝨臣

和龍皞臣聞蟬

飽諳蟬意味坐對日蒼涼天地一聲肅樓臺萬柳長杳
冥通碧落慘淡夢黃梁吟嘯耽高潔無勞臂引蜩

樹木千章暑山川一雨涼陰濃棲影悄風急咽聲長秋
氣霑微物天心飫早梁居高空自遠塵世轉蜣蜋

和龍皞臣苦旱詩時雨三日民間意猶未厭也

滔滔三日雨未敢信爲霖城郭霾雲久山川隱霧深迎
神司命曲望歲老農心旱潦愁兼至民勞力豈任

凍餒高低屋喧囂大小蠻安危資謝傅窮老惜虞卿自
笑身將隱誰能見未萌平生飢溺意虛願竟何成

題王立齋琴鶴圖

蜀棧吳船去不回江山絃管楚人哀秋風我有蒹鱸約
薄宦君隨琴鶴來六月炎蒸愁旱色孤松盤薄見雄才
刀圭比似經綸手老病憂時爲眼開

再和皞臣聞蟬

盛夏鳴初急不知秋已涼孤高眞自苦哀怨爲誰長謬
託高衢蔭甯求儉歲梁發聲頻汝伺身後有螳蜋

題袁守愚詩集

袁君詩筆一家則俊語流傳中晚唐萬古文章有根柢
九州人物滿軒廊相期無限古今事坐對新秋風雨涼
莫漫詩篇誇盛業嗟予潦倒鬢毛蒼

石筍山房詩爲吳稱三作

石筍高高青插天青山如帶枕林泉流雲冠蓋高陽里
君家昆仲八人細雨溪橋好時田三絕鄭虔猶薄宦一官元亮
已華顛何時載酒溪潭石醉踏明蘭寺閣眠

蔣金門洞庭曉泛圖

洞庭一瀉八百里萬機千槳何處尋同是江湖飛鳥過
似聞風雨老龍吟汀洲蘭芷爲誰歇雲夢煙波如此深

擊汰侵晨無限感浮雲儻有濟時心

蔣仲友梅溪垂釣圖

梅花萬樹香成海記泊桐廬江上舟百尺釣臺終古在
一泓寒水接天流秋風澧浦魚還出晚樹溪橋景更幽
開徑蔣生經世意垂綸江漢儻來求

彭雪芹宮保枉詩次韻四首

兄事爰絲吾自愧升堂捧杖許齊年

吾與君同歲生

擔當世事

公方健衰鬢蕭疏已皓然

攬勝探奇妙獨游嶽屏孤障一天秋四山風雨重陽至
黃葉飛飛怕打頭

浮雲披豁對吾真等是江湖澹沲人
滄海橫流塵劫在
自鋤散朮養閒身

叢菊斑斕綠作堆柴扉自閉少人開
短撾撾壁傳書至
庭鳥驚猜騎使來

久遲雪芹宮保不至度湘陰必可一見而已
由間道回
省惘然成詠卻寄一首

隔歲旌麾快一臨巖城秋望鬱蕭森
來隨風雨黃花晚
行踏江湖青草深
載酒正謀要路飲歸雲
豈有近人心
寒冬煨芋衡山遠
湘浦煙波何處尋

題韓魏公遺像

搢笏垂紳端拱立恍如定策兩朝時行邊落落招討使
新法紛紛條例司自昔賢姦多反覆斯人進退繫安危
深漸褊性輸公量文采風流亦我師

次韻龍皞臣北征畱別湘中親友

君出吾方隱都非壯盛時江湖終浩蕩天地有推移
賸著支離空傷昨暮兒宵長眠睡少爲問夜何其

巖壁繁松桂蹉跎笑白頭十年真鹵莽一夢抵王侯
厭逐衣冠蝨平浮江海鷗商山能力致攜爾話丹邱

聞說驪山道開通柞械勞殘灰埋瑣闥儉德式綈袍舊
日陪霄漢繁霜雜鬢毛匡衡容抗疏感激一悲號

兩載龍蛇阨摧殘及此辰酒尊猶怳怩高冢已嶙峋同
盡邱藏貉非時道泣麟斯人甯復得四顧黯傷神

兩年以來

曾文正公劉中丞及何貞老
王子壽吳南屏一時俱逝

古音嗟寂寞哀怨楚人些風雨高張夢江山屈宋家重
來看禁柳痛飲失秋瓜指顧瘡痕起吾懷儻有涯

朝野艱虞際含悽賦北征故人垂老別春水隔年生身
世餘悲憤行藏孰使令因君寄遐想孤雁遠天聲

題陳東渙舩齋詩草

武陵春水桃花發消得詩人萬古愁書劍江湖孤客淚
棠梨風雨郡城樓世途迫促無青眼文字流傳賸白頭

枉贈名篇堪一笑此身到處有詩畱

同張笠臣送別彭雪芹宮保

春江飛雨花漫漫官橈擊鼓夜已闌城鴉驚翻鐙火出
平橋晚漲浮闌干三年逢君一握手破柱龍蛇怒猶吼
怪君歸尋閭闔夢插屋梢簷橫北斗君言臺閣鴛鴦集
苦念山林猿鶴友聲名塞天身入甕所得區區亦何有
崢嶸七十二芙蓉東風激灩峯頭酒歸臥湖山恰兩年
野花山鳥日欣然夜半撾門 詔書至枳籬欹側草蔥
芊可憐春晚薜蘿碧月明照見幽人跡門前蘿薜動旌
麾天上星辰依履舄長江浩瀚水犀軍磊落人間第一

勳白衣宰相山中起絳節神仙海外聞太白樓頭今古
月楚王宮邊朝暮雲洞庭春水一回顧出處行藏從此
異醉墨怒埽梅花生狂歌試泛滄浪去畱滯周南慙舊
史龐眉衰鬢衣冠偉棄官舟楫隆準公爛醉歸休赤松
里文章突奧強窺探語言泛濫無涯涘維摩靜對無言
師目光照灼星日垂世閒臧否不挂眼洵波自息滄江
湄江楓搖搖舞風葉愁心遠寄山千疊叨陪二子覩雄
句酒尊更喜才華接坐看萬事等雲煙一鑑相對俱華
顛今夜夢君何處宿江南江北水浮天

周句賡脩竹圖

萬竹琅玕風滿林
翛然自契太初心
獨舒吟嘯壺觴畔
譜入雲山韶濩音
葛襟芒屨隨處稱
碧莎斑石坐來深
平生食筍愁回首
夜鶴淒涼萬壑陰

送曾劼剛北上

鸞旗承蔭燦門庭
鳳詔銜恩赴闕廷
雲伴三千餘里白
山畱七十二峯青
省中應識元超石
天上長懸傅說星
延閣道山藏典誥
待君寫定禮堂經

西域河源自漢通
手提鉛槧闢鴻濛
梯航山海條支俗
談笑戈矛定遠功
東下洞庭秋在水
北歸臺閣晚生風
聖朝垂問江湖逸
老病支離一秃翁

書贈黃子壽

世人泛泛掠聲影獨抱遺瑟求古音疏越朱絃聽者鮮
幽泉白石坐來深鬼神上下希微意魚鳥遊翔澹沱心
慚愧吾生闇聞道炎天攜酒話槐陰

尊公追憶五年前四海論心一宛園朗抱秋霜眉髮古
清尊夜月笑談溫人間毀譽非吾料物外依遲爲道存
仍世稱賢差不忝騎驢時一款君門

胡理軒洞庭秋汎圖

蒼茫九派洞庭流草樹風煙盡帶秋遠水寒蘆查浦戍
斷山斜日岳陽樓魚龍出沒愁天小笳鼓喧騰蹴地浮

我亦白頭徵召出月明滄海弄扁舟

時嵩燾奉詔北行

周步瀛拈花圖

將軍射虎入虎穴投徽歸來兩鬢絲
一櫓旌旗劉向壘九溪風雨武鄉祠
雷霆水底驚翻眼身世花前笑解頤
葛裕芒屨猶舊識爲君揮汗一題詩

勞文毅公挑經圖

鶴瘦雲歸無處尋偶欹禪杖臥榕陰
便教蹤跡塵寰滿畱與謳思滄海深
華屋山邱眞亦幻生涯瓶鉢昔猶今
漢廷游戲東方朔三十年前證此心

子年二十識公京師

中秋日王壬秋邀同張笠臣過朱香蓀飲

涼秋天氣雨連旬
小院清尊景復新
意外忽逢今夕會

坐中誰數去年人

去歲中秋夕會飲易笏山宅予與香蓀與焉

迷漫雲漢蟾

蜍影吟嘯湖山蟻蝨臣試就朱雲作豪語
柴門欹側鎖松筠

題吳雲谷樊籬固守圖

兩城對立依層嶺
高樹旌旗卻敵時
漢宋規模誰討論
襄樊形勝故雄奇
明時寇準資邊鎖
晚歲楊朱泣路歧
江漢遺民懷往蹟
峴山重刻使君碑

重陽日會飲潔園限韻賦詩分得陽字

雨暗秋堂覺酒香
天畱佳節看人忙
摘瓜擘蟹林園晚

掠草呼鷹天地黃十客高樓成一夢

前歲登高天心百閣與者十人

年清會幾重陽儘餘詩老看山興吞吐雲煙自笑狂

楊海

琴觀察以遊嶽麓山不與會

題楊性農越裳片羽詩冊

閉戶著書誰過問新詩寄自使臣槎江邊冠蓋紛諸阮
海外車書正一家銅柱巖荒生蔓草石盤山遠踏梅花
徵題紀勝翻成悵醉倚闌干北斗斜

渡河至峒嵒驛阻雪

忽忽峒嵒一日雪此身真覺隔天涯河流冰合天沈水
野色雲寒風捲沙短日奔馳四千里荒村寥落兩三家

故園梅信還相憶此景眞宜小閣花

宋城夜雪早發書壁

客途小憩卽爲家土銍繩牀願已奢清夢未酣驚犬吠
里犬自相齧耳寒衾重擁怯唳鴉宦情冷落看霜柳天意酣迷
舞雪花候吏不煩迎送遠此身終合老煙霞

車中望泰山二首

大峴東蒙相拱揖居高始覺勢雄尊驅車石磴雷霆鬪
弭節雲關日月昏上闕碧霞遺蹟邈東封黃腫古碑存
欲凌日觀窺滄海塵世迷漫誰與論

泰山徂徠兩先生對立巖巖萬古名尊王發微春秋學

進賢去姦雅頌情
瀕洞煙塵成古昔
盤陀山石小縱橫
暮年應召真無謂
我亦棲皇賦北征

德州途次感作

未央宮漏夜沈沈
禁籞森嚴列羽林
元祐規模甯有憾
桓榮車服竟何心
鯢移九澤滄溟渴
龍去三山煙霧深
嘯鳥野花猶在眼
塵霾白日作重陰

方存之述其尊人鶴棲先生遺訓曰
到處畱心皆學問
屬曾文正公書之邀同人作詩

世德清芬傳妙語
名賢遺墨卽良箴
先生學問非流俗
遇事研窮極古今
鬱鬱關山千里夢
蕭蕭風雨廿年心

白頭作宦猶強健愧我重來老病侵

題吳春海望雲就日圖

喬雲捧日黃人守東方醉起窺戶牖依稀尺五城南天
萬里橋邊一回首老親白髮春明游望闕趨庭忍久
畱探懷自試朝陽鳳一鳴已驚天地秋海中蛟鼉怒如
鼓手版插腰走塵土舉頭四顧吾何營歸隨白鷗臥煙
雨

題潘伯寅補柳圖

風流三相昔賢無六百年中萬柳株晚出待公傳詠事
春來飛絮滿煙蕪廉盧馮阮浮雲過亭館池臺夕照孤

最好西窗聽夜雨涼秋更作補荷圖

題李蓺淵所藏華亭姚簡叔

允在所畫

潯陽琵琶圖

白公聲名高蹇蹇一謫江州豈云遠琵琶自爲兒女悲
安肯一官相婉婉畫中幾點潯陽山如在元和貞元間
憑誰喚起匡州夢且讀公詩一解顏

題劉拙菴大令拙存詩集

見君丞相屯師處數卷新詩筆有芒白首一官遭搏擊
西湖十載寄清狂猶憐書卷平生事往看風濤萬丈強
時將從軍臺灣短後腰鞭嗟老矣才名橫海儻能償

題畫梅扇贈鍾小溪

養知書屋詩集

卷十二

七

天桃花發春三月婀娜枝含澹沱風持贈與君同一笑
江南春雨白頭翁

潘伯寅枉詩次韻奉荅

周漢歷唐遺事在昭昭史冊待誰看八方戎貉懷柔易
一閔蚊蟲剖析難埽榻清風爲我至當心白日照人寒
語公歸計宜春晚園竹新成斬釣竿

書易寶甫雪鴻小草

而翁詞賦有根柢風雅湖湘巨筆操驥子鳳雛非世有
塵天人海見文豪卷中城郭山川古眼底樓臺日月高
年少已聞驚長老豈徒期望託詩騷

題陳小舫所藏王蘭渚恕墨鳳圖

鳳麟爲瑞世莫知鉏商獲麟聖爲悲鳳巢阿閣聞古語
聖不及見還嗟咨天風琅琅海雲起知鳳者誰王處士
九苞五采徒傳疑淋漓潑墨神哉技君家雛鳳飛鳴多
子猷孫佩冠我我老鳳神姿見圖畫再拜展讀三摩挲
梧桐百尺枝磊砢覽輝時翔今亦頗鵲鴉滿天翔且高
但笑鳳皇不如我

次韻周荇農見贈

百忙抽得一身閒車馬塵埃且閉關病驥埋頭今日賤
焦螟生世古來艱一九溟渤洶時塞九鼎神姦鑄後刪

卷之二
誰道莊生驚一嚇退居材與不材間

寸步人間抵萬巖一言猶見鳳鳴岐大文星斗平生仰
微分松蒿契合奇毀譽三人成聚訟是非前史有傳疑
漢家事業皆陳迹誰問昆明試水嬉

題白蘭岩詩集

新詩到眼酒方酣聊抵西窗一夕談世味榮華消底事
一塵持向老禪參

暮景清蒼似樂天更餘書畫晚妍然傷心朋舊凋零盡
管取聲名九十年

次韻黃再同見贈

晚風蚊蚋集汗渠壞草侵牆榭葉疏萬顆蜂房眞贅設
一泓蟻穴與淪胥細觀物理成翻覆誰道人言有毀譽
努力艱難君儻屬吾歸料理讀殘書

嚴伯雅萬里看山圖

我老詩懷似冰雪不堪錐鑿祇荒寒離離山嶂蟠龍起
納納乾坤立馬看晚歲朱幡重把晤秋風黃葉滿長安
海西更出鷗鵬外笑賭滄溟擲釣竿

嚴伯雅東皋負土圖

大關振耀賢司馬一門羣從親風雅枕椰暗天人吏悲
遺棺歸葬桐鄉社起冢礱碑今古哀眼前陳迹皆浮埃

祇餘華屋山邱句寸翰能挽西山隕人生百年盡朝露
秋風蕭颯壟頭樹披圖我亦感平生見君歷歷傷心處
息柯居士壽芝圖爲林初老人作生日

夢芝巧構芝緣室霍然一笑病已失息柯妙寫芝情性
持與東坡作生日我識紫芝元魯山挂冠自脫塵埃間
定王臺畔一尊酒問君此去何時還笑指臺邊輒上字
其樂未央更何事采芝一曲商山翁還就息柯參此意
鍾馗圖爲裕時卿作

終南進士鬢眉古畫筆王濛亦有神昧谷幽都雄氣勢
朱衣烏帽好腰身直須五日菖蒲劍一掃千門瀕洞塵

莫遣兩峯圖鬼趣隄防此老見生嗔

送衛廉士還美國

大地回環一水涵乘槎歷斗助清談塵中世界原同趣
天外波濤定飽諸碧海秋深風正穩黃花別晚酒初酣
君歸皓首吾方出此意憑誰一笑參

次韻方子箴都轉見贈

本無志願到公侯敢說中朝第一流王會來同天北極
聖恩許作海西遊衰顏吟嘯龍蛇窟故國江山鸚鵡
洲一過高軒酬唱盛

時周荇農林穎叔
皆有和贈之作

黃花開徧帝

城秋

題幽宰雪鴻畫冊馮竹儒屬爲其尊人尹平司馬作

鄭虔畫師嚴譴日王詵丹青亦遭斥妙筆流傳叢棘中
無此奇冤起羅織吁嗟叔子豈鳩人謫仙詎屑永王璘
家奴告變用漢律上書自理丞相嗔適意園扉無不可
妍花幾叢山一朵日長天暗問何爲濡墨解衣盤礴裸
瀚海波濤西極流聖恩許作祁連游關門柳色沙磧
草賸稿殘箋何處收惟餘羈縶十二幅眼前萬事都非
故趙武孤兒掩淚看想見泥鴻畱爪處柳州文筆古來
奇烽火遺棺尤苦悲更圖萬里尋親冊譜入蓼莪明發
詩

日本百武參贊枉詩奉荅兼示上野公使

卅二國成一都會

時充使倫敦三十二國

寥寥相對海東人蓬萊

方丈天同遠劍珮星辰景更新客裏琴尊歡入夜雨餘

花柳暗回春參軍詩筆能驚坐又爲征軺浣別塵

時西德佐

使方回巴里

昭君怨和董韞卿尙書

漢宮何緣嫁娉婷淚珠飛墮鴛鴦屏豐容靚飾不自媚

莫怨遠棄單于庭琵琶自按新聲譜俗耳譏評類胡語

黃雲落日試回看始信此聲彈更苦空房曉霧生簾櫳

繁華轉眼燭散風塵海涵奔等閒度比似玉砌號秋蟲

談笑江山賭一快季布何心斬樊噲終軍班超名塞天
一據風沙愁出塞傾心圖畫望承恩爭妍妬寵亦多門
君恩自淺妾命薄區區畫師何足言

移居

客行四萬八千里忽忽移居咫尺間天地容身無礙小
人禽爭食祇求頑九衢車馬奔成海萬戶雲煙疊似山
小作遷家高處住支窗容我一開顏

早起見雪喜而有作

細碎風聲昨夜聞曉寒輕幌綴冰紋鳩呼日出朝煙溼
鵲踏枝翻細雨紛忽憶妙高峯頂雪招來嶽麓寺前雲

殊方歲晚真無柰取次顛狂藉酒醺

金眉生寄示魏忠節公遺書石刻

元黃倒置明事亟緹騎橫馳石人泣茄花委鬼何自來
內椽外訐殆哉就中左魏六君子奇冤塞天天欲死
堂堂遺墨三百年蟠鬱猶挾風雷起漢明朝局反覆同
高拱禪與奄寺雄祖龍擅勢禍真烈磨洗天下爲沙蟲
一夫荼毒萬方病陵夷至明嗟已甚遠蒙石刻愴遺言
藏形滅名差自聖我不負國還負家摩挲此語三歎嗟
且更負身負良友反求不得無譏諱

養知書屋詩集卷十三

湘陰郭嵩燾筠仙著

綠奇女史催粧辭

去年相見試新茶
曲折闌干第幾家
正是清明時節近
春風開徧碧桃花

千點明鐙照畫堂
玉簫能引鳳求凰
藐姑冰雪珊珊影
一奏霓裳夢渺茫

窺牆宋玉已三年
不放游驄拾翠鈿
芝草琅玕環玉砌
羽林華胄豔神仙

深春放作十分晴
青鳥窺窗緩步迎
八尺紅氍千疊錦

養知書屋詩集

卷十三

天香繚繞似花城

乘龍夫壻世間無青鎖樓臺白馬駒
記過浣紗溪畔路儘揄鐵網網珊瑚

一帆東海賦移時楊柳煙絲踈地垂
貽贈瑤華聊一笑銀瓶索酒悵歸遲

哭謝麀伯

畢竟前賢畏後生英年早識老成名
斯文崔魏淵源意並世徐陳許與情
一面無緣人已逝流言有憾事難明
楚才太息凋零甚白首窮荒祇自驚

贈長崎道志

護軍冠玉陳平似絕勝人才東海隅爲問西來青鳥使
閒窺朱牖識君無

題希斯園林

軒廊回合水平池石洞幽深境轉奇忽憶蓮華峯下路
參天松檜出巖時

朱香蓀爲劉韞齋中丞作綠野引春圖

畱春纔見惜春情幾度春歸白髮生正倚斗山勤頌禱
放教風日展清明湖湘韻事新圖出鼓吹謳思舊部榮
我亦生逢三月暮海天吟望數歸程

喜袁子文至

兄弟事袁絲吾豈敢頻蒙佳句到蓬廬君猶希幸張三品
我欲追尋漢二疏世上紛呶聚蚊蚋眼前嘻笑到禽魚
炎天風雨灑然至好伴清談摘晚蔬

酬朱香蓀

疾風厲百草哀鳥鳴相遭物化自推移默識心昭昭義
皇古已淪用法紛牛毛人心如放豚旣縱誰能招斯文
起憂患哀怨餘莊騷筮遯鉗吾口無使神魂焦
微才蒙記錄逶迤廁冠履亦悲古賢達屑屑東山起江
河浩瀚流吐納滄瀛水吾隨與西注意與乘桴比誠不
如老農趨田勤舉趾夜半波濤立喧豕猶在耳

大旱汾晉枯沴氣彌畿甸江湖雨滔滔生命泥沙賤誰
能挽勺水救彼燎原焰端資迴斡力千鈞引一綫聞知
匪吾任此理窮必變及衰退耕野屬眼今時彥庶幾起
疲癃杖箠吾請先

香蓀枉贈春鐙話舊圖奉和五絕句

一帆天外數歸程慚愧區區犬馬誠欲問釣磯何處是
祇餘愁病玉溪生

歸休名字從人賤散亂琴書閉戶尊榆柳解隨斜日影

招呼杖履到柴門

病中謝絕酬應惟一二
故人日夕過談而已

雨草風花屋角稠愁春心更比春愁趁將春晚勤栽竹

與世同稱瀟灑侯

不用遲留待賜茶
春畦欹側種胡麻
雨窗話舊鐙初爇
圖畫衰翁望更賒

知己已難知
德鮮寥寥今古更無人
平生風義朱雲在
肯顧荒山老病身

次韻朱香蓀始自海外歸見贈

投荒已分無歸日
何意生還入玉門
身後宜留公論在
篋中猶贖諫書存
訾謗萬口隨潮湧
寂寞孤懷借酒溫
脫足耦耕心自決
安危得失待誰論

剛揜同傷陽德孤
金車困更甚泥塗
儘容握齷稱尊宿

豈分朝廷用老儒半畝林園資幹濟故山風雨隱樵蘇
有苗共繇皆凶族萬古持平是典謨

次韻朱香蓀見贈

佳句頻貽慰賜還同憂同病兩身閒幽花媚戶沈冥老
壞草侵垣次第刪人共青山爭遠蹈天畱白日照衰顏
故人健在身無事淪茗焚香自掩關

題袁子文三友圖

圖爲羅漢三一長眉一伏虎一布袋和尚也

五百應真中健者流傳十八取三人眉長委地不計世
腹大著袋好藏身吾何畏者足當虎視若無焉能使馴

養知書屋詩集

卷十三

四

於世無爭亦無懼祇應摩詰與傳神

黃子壽五十壽辰

傳家簪紱燦盈庭高論名言自一經東閣琴尊頭早白
西園冠蓋眼終青山川如夢看冬盡雨雪初停待酒醒
更欲消愁向何處梅花相約水邊亭

陳右銘於長安市中得高碧湄爲李眉生書冊屬題

石鐘山人海鶴姿妙語脫口爲新詩祇今一官百僚底
殿閣論思及者誰長安貴人誇翰墨妍姿巧出簪花格
李侯虎視角兩雄羊欣道護今安得使君聲名高塞天
掇拾畱貽五百年紛紛世眼忌文字珍重隄防萬口傳

張笠臣邀同傅青餘李次青鄧彌之黃子壽黃小麓黃
杭生定王臺脩禊

吾衰廢吟詠謝病歸故居 朝廷閔誓苦指笑還吳書
追歡上巳辰賓從接襟裾尙羨登臨美誰言世味疏崇
臺煥新構緬懷盛漢初地陋無迴旋適意卽吾廬偃仰
萬花叢當春齊吐舒浮雲蔽高天飛雨灑前除雖無風
日朗足極視聽娛招攜塵物表豈異逃空虛泛彼流觴
心俯檻窺寒渠希古無良軫四顧渺愁余慎勿笑老蹇
語拙意有餘

題丁禹生蒼茫獨立圖小照

今我何爲思海陽遺經不作古人亡
老師祭酒吾安放
伊陟巫賢君豈忘形影自將心磊塊
風雲百變天蒼茫
望公再起調元化甘守鋤犁老故鄉

題向脩梅秦人室詩冊

生平自許浣花翁遭際文章亦頗同
喪亂幸非元肅世
恬嬉猶是慶光風家餘桑竹秦時宅
氣雜幽燕亂後功
野史亭荒孤憤在遺山原不爲詩窮

奉送陳右銘之官河北

朝野艱虞際真嗟學術疏望深才數
出事急願非虛磊
落廷臣薦飛騰使者車收功楹棟遠
誰解誦迂書

用涑水迂

書語

懷魏川原壯疆圻命數齊唐封尊節使漢詔領河隄行
旆秋方盛晴輶日向西謳思湘楚地翹首失攀躋

君才堪國計我老謝朝簪敘述悠悠世傷時寸寸心雲

山梁苑古風雨楚江深更有依遲意高原鶴在陰

兼謂公子

伯嚴

題張寄農太虛獨鶴圖

爲其父鏡南學博作

高人生世能遺世萬古寥天一鶴飛往迹雲煙何處夢
夕陽城郭幾時歸君家舊業青瑣在官舍連山綠樹圍
爲感遺言入圖畫太虛塵世兩忘機

龍潭山

小雨悒悒釀薄寒
龍潭煙雨隱雲端
積陰鬱氣浮天遠
應迹仙蹤入世寬
遠道開山新建節
清秋景物賸憑欄
老僧一掬憂時淚
去日還嗟來日難

十月九日曾太傅祠集同人爲展九會

古來佳節獨重九
展九可至一月後
吾衰世事百無營
但對黃花尙酣酒
伐鼓戒期急徵召
倚裳縱橫十六窰
浩園頗亦似衰翁
狼籍殘荷與枯柳
晴冬三月無雨澤
驕氣蒸騰到藜莠
鰯池水淺不受釣
枉使莊周校升斗
猶憐叢桂小山幽
餘香交柯逗窗牖
江夏黃公信尊宿

文場割據聲名久論年尙欲長熊侯八十精神能抖擻
七十以上得七人過六十者兩黃耆五十者五四十一
瞑翁斯文若瑩琇少年文章能屈鐵晚出爭雄一子玖
屈指九百五十年十五人中數誰某故應合作千歲讌
如陳一堂古彝卣李侯避席去不顧畱此闕典將誰咎
湖湘韻事豈易得飛函促召紛馳走傳君語言妙天下
宙縱宇橫曰宇壽老夫絕迹城市游自笑形容已衰醜
曳杖連騎更遭罵猶能埽苔持敝帚楊鄒二老富聞見
古賢此樂能同否二卿理深袁藻速朱黃才量江河受
周侯衣冠更奇古呼石爲兄菊爲友彊我作主同張侯

要攬眾山歸培塿歡娛天地無盡藏約束壺觴期善取
識君等是濟時彥名棄軒冕就林阜安西都護駐疏勒
雞林雨雪屯兵守宣仁臨朝哲皇幼章蔡濟濟紆簪綬
千官抗論政事堂可惜書成無覆瓿甯知豐鎬圖王會
滌除凶暴惟忠厚弛張要出戈鋌外豈屑功人與功狗
張侯妙著瀛海論奇氣鬱勃蛟龍吼古音領悟遺絃指
至理參詳在瓦缶強持調語聒後生有似鴻荒經闢剖
還登高臺望八極煙霧溟濛雜塵垢眼前崧華起方寸
湘鄉益陽今安有遺祠數得名賢集長抱茱萸開笑口
勝游晚景急追歡繞階蟲鳥鳴相偶欲作雲山千歲圖

惜無前輩荆關手韓蘇若在鬪奇句定去俗書摩蝌蚪
世閒良會能有幾萬事一過徒爲負湘江雲麓久見招
坐對青山嗟白首盛衰轉眼誰料得要與作詩傳不朽
次韻熊鶴村催詩用東坡尖又韻

纔回春信雨廉纖疏影寒窗夜氣嚴待品名花梁苑酒
又添微雪謝家鹽急催深斂存孤賞細蘂幽芳稱短簷
今日定知開滿樹看君歡喜上眉尖

朝來城上有歸鴉選勝園林走鈿車何似衰翁雙鬢雪
獨移遠樹早春花斷橋殘雨調鶯地短竹疏籬放鶴家
鐵石廣平吾自笑旗亭賭唱手交叉

意城招同諸君頤園脩禊

名園佳節有流觴
晞髮臨軒日載陽
舊雨畱人松石外

坐中熊鶴村袁予文傅青餘諸老皆舊好羅瀛橋任芝田李佐周則並數年不相見也
春風坐我

笑歌旁病依杖履陪遊健
暖入池臺注酒香
一會一圖

叨屢與

壬申脩禊絜園庚辰脩禊葵園張笠臣方伯並有圖

爭傳韻事楚江長

九日東山作

常年九日天心閣
攜榼傾觴各盡歡
南澗荆榛來拄杖

東山風雨賸憑欄
林深煙樹疏逾落
秋盡江天晚更寒

正憶絜園高會處
衰年盛集兩逢難

次韻朱香蓀見贈

好友無多衰病在蕭疏鬢髮感平生傾心許與一言重
過眼雲煙萬事輕細雨松葵成小摘深秋猿鶴作寒聲
與君歲晚存貞性霄漢高懸野老名

題陳

駿聲

舜鄰芳草堂詩集

短日頻驚老景催悠然懷抱向誰開千詩照壁歡投刺
一笑巡簷索舉杯醉眼翻花欹枕卧朔風吹雪送春來
元和大厯今安有盼望風騷起逸才

次韻黃笏堂見贈

衰病無端傷歲晚新詩讀罷欲淩虛飽探李賀囊中句
竟屈梁鴻廡下居萬壑枯松盤海鶻滿篷寒雪卧溪漁

知君病足情相似待試奇方泰始書

正月二十一日浩園小住爲屈子作生日

沾丐芳馨屈子鄉生時原繫楚興亡一尊激激寒將盡
萬卉萋萋日載陽倚託風騷哀怨在發揮謠俗事功長
諸君等是逢衰晚相對蕭疏鬢髮蒼

清明日朱禹田邀集萱圃賞牡丹次張笠臣龍華嶺韻
萱圃春深霧雨來牡丹池館興悠哉絳帷覆檻嬌雲墮
寶靨生潮紫海回寒食清明隨意過穠花細柳簇團開
輸君高詠龍華嶺傾注牀頭百寶醅

江南春嶂擁雲鬟一棹煙波縹緲間湖外嵐光存想像

雨餘花影漲洄渚奇如草木猶堪敬聖到詩書祇待刪
文字嬉遊真一夢萬峯回首是東山

謁屈公祠有懷李次青

生長江潭屈子鄉羅淵疑冢久荒涼一筇白髮尋遺迹
萬壑蒼煙隔夕陽長佩高冠騷意在抽思惜誦楚風長
昌江獨攬湘流勝洄溯蒹葭水一方

何塘晚泊

何塘四月行人稀時見鷓鴣江上飛晚舟急挾風雨至
山花落盡楊柳肥人家慣作臨水住萬頃滄波無限樹
年年水高出樹顛天長路遠人何處鳳皇舊是軒轅臺

祇今埋沒青草堆何塘阻水不得渡寒煙苦雨生悲哀

河伯潭

說文長沙汨羅淵屈原所沈水卽此

酹酒澄潭弔屈原一江曲折出羅源奔騰九派湘江水

水經注以湘水統洞庭九江宜分九派汨羅二水并自爲一派

汨沒千秋楚客魂

莊子與齊

俱入與汨偕出郭象注同汨而涌出者汨也汨羅淵蓋楚人所以哀屈原不得爲水名說文可證

河伯

罷官從置汎人家依水自成村水經澗水分明在終古

貽譏酈道元

汨羅淵實爲羅水今自小江口以西澗水南出挽船步羅水北出半步灘二水時有

分合而凡今汨水所經行一皆羅水故道也道元水經注混而一之奪汨水之名以與澗水而羅水之名遂隱矣

磊石山

青草湖南十里山嵯峨磊石一湖間水經酈注真成誤

青草山卽今青山酈道元以磊石當之誤別錄唐賢足解顏
洞庭原名青草唐賢分爲南北

兩湖蓋爲水經注誤也晚歲江湖空偃蹇晴天雷雨失躋攀時阻雨不

及登九江雲夢原同澤輪與湘君著髻鬟

自夾洲出豪河作有序

梁書王僧辨傳陸納襲湘州詔僧辨等討納納遣其將吳藏等據車輪洲僧辨軍至陸納夾岸爲城前斷水勢僧辨作連城偪之水步競出大戰於車輪陷其二城賊大敗歸保長沙胡三省通鑑注車輪據湘水之要而不詳其地明世志乘已稱洲圯於水而皆據

以爲在湘陰縣北是時陸納初踞湘州其力不能及
遠自縣以北瀕湖曠野非可據以守獨今武西灣河
二渚正塞湘江口兩岸可以連營相保二洲相夾如
車輪僧辨破陸納於此無可疑者至今洲固存未圯
也舟行有悟車輪之義因詩以記之後之考求輿地
者覽焉

五渚中間二渚鄰兩洲真是夾車輪前朝戰績風雲古
斜日蒼波天地春陋俗誰能傳楚乘圖經無地紀湘濱
幾家煙樹溟濛裏懷古蒼茫迹未湮

趙公橋

隋書羅有湄水汨水人知此水
出鴨子湖不知爲湄水之委也

昌江水接碧湘流萬古湄津據上游曲港縱橫成聚落
夕陽明滅到林邱隋書疆域誰能紀野錄山川儻見收
愧負平生懷古意五湖煙雨一扁舟

琴基淖

水經注磊石山西北對青草湖西對縣城口今琴基
望北鮎魚洲南受柴蚌湖水流徑琴基望爲鮎魚洲
口當卽酈道元所謂縣城口也巴陵吳舍人謂琴基
望爲城基望其言殆確不可易

羅益湘西地接連經營開闢此山川崢嶸磊石成孤立
搖盪湖波隔一天四月餘寒侵細雨半篙小泊稱輕船

城基儘與湖爭地忍導橫流誤力田

乾隆中撫臣倡爲蠲地與水蕩毀園

田存及上游百數十
里爲禍亦烈矣

送曾沅甫宮保赴廣東

銅柱扶桑照曉暎重分節鉞嶺南尊孤忠九宇心同運

百戰元勳今幾存 詔起江湖符眾望感深山海亦

天恩誰窺吐納乾坤意周漢規模待細論

清茗疏窗語入微舊游如夢看雲飛高颿遠浦風生樹

盛夏輕涼雨溼衣吾道豈容爲世貶深談同覺向人稀

多慚從領安懷旨一奏驪歌鼓瑟希

次韻周昌輔六十初度

文章巧妙互鉤聯一墮塵囂與物遷龍象人天無盡眼
雞蟲身世有窮年兩三兄弟存亡感六十光陰老健緣
與君皆兄弟三人皆存其二皆踰六十去去江南何所事湖光山色發新
妍

無題

引路憑鹽走鈿車綺窗重疊碧紗糊牆東宋玉長窺女
陌上羅敷悵有夫黃鵠清池長共戲青蠅白璧稔成污
傾城傾國都能料臣里佳人曠代無

王佩迴旋月半弓鏡臺畱照影腫臃雀來燕室甯容汝
鳩爲鳩媒最惱公曉露氣浮蕉葉白夕陽光借柘枝紅

牽蘿補屋憐秋盡細碎簾櫳昨夜風

閭闔天高夢亦疑何緣舒翼更張箕疾風暈月原先兆
宿雨成霓儻自知堂後生萱看似霧江南折柳淚連絲
無多殘燭催春曉花信荼蘼待幾時

東海潮生萬口罔欲通情悖隔微波花妨風妬持鈴護
月受塵蒙借鏡磨一綫江流爭岳鄂九州山勢起岷峨
相思枉費愁千斛慘慘秋雲薄似羅

次韻朱香蓀和張笠臣作

注瓦原知勝注金人生憂患古來深浮雲變沒紛紛口
凍雨銷磨寸寸心五噫崔巍瞻近闕九歌哀怨託微吟

多君薄俗論交誼自抱孤懷片月沈

戲柬龍樹棠

生平守拙勤鹽齋日食兩甌兼醖醕親友噉噉交口嘯
愧乏智力相提攜世途千徑馳輪蹠苦思薦引無階梯
樹棠老人手一犁終日吟哦聲慘悽一身屈曲茅屋低
滿壁墨瀋汙塗泥中有光氣騰虹霓詩成萬目紛睽睽
祇愁酒甕無標題誤倒醬瓿餐醢雞向人苦索買酒貲
日持一榼隨小奚腹大如瓠比滑稽冬寒日短冰流澌
我亦困卧傷孤棲古來豕蝨與濡需王侯螻蟻理亦齊
我願與爲無町畦或時責望或排擠門前石路深成蹊

顧視顏面愁凍梨空負志願憂窮黎閭里咄咄叢訶詆
君胡爲者抱瓠蟲酒馨無力傾千棹贈君四千羅朱提
斗杓斜挂屋檐西仰天放飲窮酣嬉安得糟邱淄寒谿
一醉萬事同昏迷簷沙鬢髮如鵝鵝

鄧湘皋先生所藏雙硯圖鄧子柔屬題

漳河澄泥水流楮硯材畱得銅臺瓦還陪染翰中書堂
當塗歲月去如瀉後百餘載剡溪翁題詩遠攬峨眉雄
一片琳腴經幾劫紫府傳賜親題封兩宋人文渺陳迹
西陵東川纔咫尺端須健筆如脩椽喬雲墮手光凝碧
玉蟾一滴蒸彤霞拓本流傳好事家臨川韻事南村得

雋語著紙如盤蝸嗟予生晚成衰歎眼看醇古變澆散
磨甑鑿石視此圖夜半長虹燭霄漢南村且喜得名孫
范氏傳研今猶存壁間隱隱作聲響高車駟馬屬誰門
次韻周昌輔

萬國珪璋極拱辰衰顏虛望 翠華春石城銅柱功猶
在聶壹王恢禍有因向日樓臺今匪昔浮雲身世夢耶
真誰言六十非強健猶及瀛洲跨鶴巡

定王臺與賀禮耕楊砥皆同游作

荒臺寂寂二千年小憩秋堂倦欲眠落葉苦爭風定勢
斷雲猶戀雨餘天撫琴自笑成游癖荷鍤惟應伴酒顛

石檻欹斜苔徑滑可容張袖一回旋

酬朱香蓀

驅車未省適誰門向日攤書借小溫松頂驚寒回鶴夢
梅梢沃雪淨花魂校量臧獲原同失僥倖荆凡或兩存
把誦新詩愁薄暮滿江煙雨水天昏

喜陳右銘來湘瞑菴有詩次韻

坐深茵几盡回溫一室盤旋爲道存急徹皋比明聖學
同歸田里是天恩寒窗風雨圍鑪樂深巷蓬蒿閉戶
尊好事朱雪真健者抗心孤詣莫輕論

次韻酬陳右銘

煨芋寒宵土銼溫浮雲變滅此心存幾人白首蹉跎老
一棹清江浩蕩恩開徑衣冠塵外集還山松菊別來尊
黃梁夢醒酒初熟毀譽紛紛何足論

暝菴五疊韻見示道爲東坡作生日次韻要之

滿斟濁酒待春溫老輩無多氣誼存枉過門庭原好事
深銜杯斚亦承恩一廬穩卧蓬蒿長半榻招延杖履尊
屈就東坡作生日世間得失不須論

再次前韻酬陳右銘見贈

冬晴幾莫辨寒溫忽悟新詩敝篋存恕醉陶潛自知謬
貪奇杜甫少畱恩

長慶中唐扶御史遊嶽麓寺詩云兩
詩物色采拾盡壁間杜甫真少恩蓋

用杜公道林嶽麓詩物色分畱與老夫句意

耽吟才盡輸三日閤亂心孤寄

一尊且喜賢人德星聚紀羣交誼待重論

爲東坡作生日與瞑菴同作

慈仁寺裏五株松酌酒松陰踏曉鐘北宋風流猶在眼

西園冠蓋已無蹤

戊午歲沈文忠公邀集慈仁寺爲東坡作生日祁文端公許仁山閣學楊

濱石編修皆已物故存者潘伯寅尙書與僕耳

鏡中霽雪憐空影

慈仁寺樓懸巨鏡收西山

雪景如畫

湖外閒雲記舊容玉局仙人知此意直須一醉倒

千鍾

次韻朱瞑菴聞邊報有感

倏忽煙塵萬事非晨星幾點故人稀走丸峻阪時難再

畫策雲臺願已違
符節邊關森禁旅
鉤陳天闕動危機
深宵北斗巡簷望
風露中庭溼滿衣